

PRIMERA CARTA DEL APOSTOL SAN PABLO A LOS CORINTIOS

¹ Che co jae Pablo. Tumpa cheparavo aico vaerã Jesucristo jemimondorã. Echa'ã cua co jae Tumpa jei vae. Cheriví Sóstenes ime cua pe oĩ che ndive. ² Aicuatía cua tupapire opaete pepurugüirovia vae Corinto pe piyembatí vae reta pe. Pe reta co jae Tumpa imbae. Tumpa peparavo peñono tee vaerã íyupeguarã. Cuarãi Tumpa uyapo Cristo Jesús rupi. Jae ramíño vi Tumpa uiparavo opaete yondeYa Jesucristo re güirovia vae reta. Jae reta opaete que rupi ñugüinoi. Jae reta iYa co jae yandeYa Jesucristo. ³ YandeRu Tumpa jare yandeYa Jesucristo tumee peve ipiacavi jare ipiacatu.

Yasurupai umee Tumpa pe Corinto pegua retare

⁴ Jecuaeño amee yasurupai Tumpa pe peré, Tumpa umee ipiacavi peve Cristo Jesús rupi ramo. ⁵ Echa'ã Tumpa pemivendise ete, pepuere vaerã pemimbueu ūru vae reta pe jare picuaa cavi vaerã. ⁶ Jare jucuarãi pe reta picuaaca ūru vae reta pe añetete vae co jocua amimbeu peve Cristo regua vae. ⁷ Jucuarãi uata'ã etei peve penti ave mbaepuere Espíritu Santo umee vae. Jare jecuaeño peäro piyerovia reve yandeYa Jesucristo ou ye vaerã. ⁸ YandeYa Jesucristo jecuaeño pemimirâtata jae ou ye regua, agüiye vaerã quía ipuere pembijeco mbae re jocua ara. ⁹ Tumpa

jecuaeño uyapo jei uyapota vae. Echa'ã jae peparavo, pico vaerã Taí ndive. Jae co yandeYa Jesucristo.

Upurugüi rovia vae reta uyembiyao uyugüi

¹⁰ Cheriví reta, che pumiñera, yandeYa Jesucristo jee re agüiye vaerã piyeaca uyupii, jare agüiye vaerã piyembiyao piyugüi. Pumiñera pico vaerã penti ramiño. Toyovaque pepia pe piyemingueta oĩ vae jare pearacuaa. ¹¹ Echa'ã Cloé jenta pegua reta umimbeu cheve peregua, cheriví reta, quirãi piyeaca pico uyupii. ¹² Amocue pe reta pere: “Che co jae Pablo regua.” Jare amocue pere: “Che co jae Apolos regua.” Jare ūru pe reta pere: “Che co jae Pedro regua.” Jare ūru pe reta pere: “Che co jae Cristo regua.” Jáeramo tae peve cua: ¹³ Cristo uyembiyao'ã etei. Che amano'ã co curusu re pumbaeyoa reta jeco pegua. Piyembibautizaca'ã co cheree re. ¹⁴ Amee yasurupai Tumpa pe quirãi mboviño pumbibautiza. Jaeño ambibautiza Crispo jare Gayo. ¹⁵ Jáeramo pepuere'ã etei pere cheree re piyembibautizaca co. ¹⁶ Añete yepe, ambibautiza Estéfanas jenta pegua reta vi. Êrei chemandua'ã ambibautiza ra ūru vae. ¹⁷ Echa'ã Cristo chembou'ã apurumbibautiza vaerã. Jaeño chembou amimbeu vaerã ñee icavi vae. Êrei aiporu'ã ñee iyaracuaa catu vae pegua. Echa'ã jocua nunga ñee aiporu yave, aramoi ñee Cristo icurusu regua ndarau tẽi mbaepuere güinói.

Cristo co jae Tumpa iyaracuaa jare imbaepuere

¹⁸ Echa'ã yamimbeu yave ñee Cristo icurusu regua, cañitei pe yugüiraata vae reta ipia pe uyemingueta tẽi jae penti mbiquere co. Êrei cua

ñee rupi Tumpa uicuaaca yandeve imbaepure. Echa'ã yande yayemiasaca co. ¹⁹ Echa'ã Tumpa iñee pe uyecuatía oĩ cuarãi:

“Che aicuaacata quirãi iyaracuaa catu echa vae reta añetete iyaracuaa'ã etei co” —jei Tumpa—.

“Jae ramiño vi aicuaacata quirãi opaete mbaembae uicuaa cavi echa vae reta añetete uicuaa cavi'ã etei co” —jei.

Jucuarãi uyecuatía oĩ.

²⁰ ¿Quía ra co jae iyaracuaa catu vae? ¿Quía ra co jae mboroyocui re oporomboe vae? ¿Quía ra co jae ipoqui cua ivi pe uyeaca vaerã vae? Echa'ã Tumpa uicuaaca quirãi aracuaa cua ivi pegua mbae'a co. ²¹ Ivi pegua reta ipuere'ã uicuaa Tumpa jae reta iyaracuaa catu echa vae rupi. Ërei Tumpa umbiasa upurugüirovia vae ñee icavi vae yamimbeu vae rupi, yepe tẽi penti mbiquere echa iru vae reta pe.

²² Echa'ã judío reta uipota yayapo vaerã penti miacañi jae reta uecha vaerã. Jare judío mbae vae reta uipota yayemingueta vaerã iyaracuaa catu vae cua ivi pegua reta uyemingueta rami.

²³ Ërei yande yamimbeu chupe reta quirãi Cristo umano curusu re. Ërei cua yamimbeu vae penti yembiovai judío reta pe, jare judío mbae vae reta ipia pe uyemingueta tẽi penti mbiquere co. ²⁴ Ërei Tumpa uiparavo vae reta pe Tumpa uicuaaca Cristo rupi quirãi tuicha ete co imbaepuere jare quirãi iyaracuaa catu ete co. Tumpa uiparavo vae reta co jae judío reta jare judío mbae vae reta. ²⁵ Ime amocue ivi pegua iyaracuaa catu

vae. Êrei Tumpa iyaracuua catu ete ye cua reta güi, yepe tēi jae reta ipia pe uyemingueta tēi penti mbiquere co Tumpa Cristo rupi uyapo vae. Jae ramiño vi ime amocue ivi pegua mbaepuere güinoi vae. Êrei Tumpa imbaepuere tuicha ete cua reta imbaepuere güi, yepe tēi jae reta ipia pe uyemingueta tēi Tumpa Cristo rupi uyapo vae jucuarāi uyapo mbaeti mbaepuere güinoi ramo.

²⁶ Cherivi reta, pemandúa Tumpa peparavo vae re, yepe tēi jeta'ã co iyaracuua catu vae reta pepite pe - jucuarāi jei chupe reta ivi peguareta - jare jeta'ã co mbaepuere güinoi vae reta, jare jeta'ã co mburuvicha reta iñemoñaa reta. ²⁷ Echa'ã Tumpa uiparavo iyaracuua mbae vae reta cua ivi pegua re vae reta, iyaracuua catu vae reta uicuua vaerāa iyaracuua mbae'ã co Tumpa pe. Jae ramiño vi Tumpa uiparavo mbaepuere güinoi mbae vae reta cua ivi pegua re vae reta, mbaepuere güinoi vae reta uicuua vaerā imbaepuere mbae'ã co Tumpa pe. ²⁸ Jae ramiño vi Tumpa uiparavo iparavete vae reta jare uñereriroca vae reta. Uiparavo vi mbaembae uyembutuichaca mbae vae, uicuaaca vaerā mbae'ã co mbaembae uyembutuichaca vae. ²⁹ Jare jucuarāi uyapo Tumpa, agüiye vaera quía uyembicate jae jovaque. ³⁰ Êrei Tumpa etei peapo penti ramiño Cristo Jesús ndive. Echa'ã Cristo Jesús rupi Tumpa umee yandeve aracuua. Jae ramiño vi Cristo Jesús rupi Tumpa yanembujupi jare ñaneñono tee iyupeguarā jare yanderepi mbaeyoa güi. ³¹ Jáeramo yayapo Tumpa iñee pe uyecuatía oĩ vae rami. Echa'ã uyecuatía oĩ cuarāi: “Ime yave quía uipota uyembicate vae,

tuyembicate yandeYa re.” Jucuarāi uyecuatía oī.

2

Umimbeu quirāi Cristo umano curusu re

¹ Jare aa pepi yave, cheriví reta, amimbeu peve añete vae Tumpa regua. Aipota'ã pepia pe piyemingueta vaerā aicatu co chemiari vaerā ani chearacuua catu co. ² Echa'ã pepite pe aĩ rambueve, chequirēi amimbeu peve cuaño - Jesucristo jare quirāi jae umano curusu re. ³ Jare pepite pe aĩ rambueve, chepia pe ayemingueta aramoi ndarau piyapisaca cheré. Jáeramo arirí aquiyeramo. ⁴ Jare chemiari peve yave amimbeu vaerā peve ñee icavi vae, aiporu'ã ñee reta cuimbae iyaracuua catu vae uiporu vae aicuaaca vaerā peve ñee icavi vae añete co. Echa'ã chemiari peve yave, aicuaaca peve ñee icavi vae añete co Espíritu Santo imbaepuere rupi. ⁵ Jare cua ayapo agüiye vaerā cuimbae iyaracuua catu vae jei vae jeco pegua pepurugüirovia. Aipota pepurugüirovia vaerā Tumpa imbaepuere jeco pegua.

Tumpa uicuaaca yandeve Espíritu Santo rupi vae

⁶ Ërei ore nduiporu ñee aracuua pegua ipirāta ipurugüirovia re vae reta ipite rupi. Ërei cua aracuua ivi pegua'ã co jare jae'ã vi co ivi pegua reta juvicha reta iyaracuua. Echa'ã cua juvicha reta imambae opata. ⁷ Ërei ore ndoe vae aracuua Tumpa güi ou vae co. Cua aracuua tenonde yave uyecuua'ã. Echa'ã tenonde yave Tumpa uicuaaca'ã etei. Ërei iyipi güive Tumpa iquirēi uicuaaca yandeve cua aracuua, yayembiasaca

vaerā. ⁸ Êrei mbaeti penti ave ivi pegua reta juvicha uicuaa cua aracuaa. Echa'ã mburuvicha reta uicuaa yave mona, ndarau tēi uyuca curusu re yandeYa yembiadora pegua vae. ⁹ Êrei Tumpa iñee pe uyecuatía oĩ cuarāi:

“Mbaeti quía uecha jare mbaeti quía uyandu jocua mbaembae Tumpa umicuatiro ma uau Tumpa vae reta pe vae.

Mbaeti vi quía ipia pe uyemingueta jese.”

Jucuarāi uyecuatía oĩ. ¹⁰ Êrei Tumpa uicuaaca yandeve Espíritu Santo rupi. Echa'ã Espíritu Santo uicuaa opaete. Uicuaa vi opaete Tumpa regua yavai ete yaicuaa vaerā vae.

¹¹ Penti vae ipuere'ã uicuaa ūru vae ipia pe uyemingueta vae. Jae eteiño uicuaa. Jae ramíño vi mbaeti quiave uicuaa Tumpa ipiayemingueta. Jaeño Tumpa iEspíritu uicuaa. ¹² Jare Tumpa umee ma yandeve Espíritu Santo. Jáeramo yandepia pe yayemingueta'ã ma upurugüirovia mbae vae reta ipia pe uyemingueta rami. Echa'ã Espíritu Santo uicuaaca yandeve mbaembae Tumpa umee yandeve ipiacavi jeco pegua vae. ¹³ Jare ore numimbeu ūru vae reta pe cua mbaembae. Êrei nduiporu'ã ñee iyaracuaa catu vae oporomboe jese vae reta. Ore nduiporu ñee Espíritu Santo oremboe jese vae reta: Jáeramo nduicuaaca ūru vae reta pe mbaembae Espíritu Santo pegua ñee Espíritu Santo oremboe jese vae reta pe.

¹⁴ Êrei upurugüirovia mbae uipota'ã güirovia Tumpa iEspíritu oporomboe jese vae. Echa'ã mbae'ã echa chupe. Ipuere'ã uicuaa. Echa'ã jaeño Espíritu Santo ico ipia pe vae ipuere

uicuaa. ¹⁵ Echa'ã Espíritu Santo ico ipia pe vae ipuere uicuaa cavi opaete cua mbaembæ. Êrei upurugüirovia mbae vae ipuere'ã uicuaa cavi upurugüirovia vae regua. ¹⁶ Echa'ã mbaeti quía uicuaa cavi yandeYa ipiayemingueta, jare mbaeti quía ipuere omboe yandeYa mbaembæ re. Êrei yande yandepia pe yayemingueta Cristo ipia pe uyemingueta rami.

3

Uyeyocui reta Tumpa pe

¹ Cheriví reta, chepuere'ã pumingueta ipirata ipurugüirovia re vae reta pe ayemingueta rami. Pumingueta jei vae rupiño yugüireco vae reta pe ayemingueta rami jare Cristo re güirovia ramo vae reta pe ayemingueta rami. ² Pe reta co jae sambiai necheño jou vae reta rami. Pe reta jae'ã co ucuacuaa vae tembiu ipuere jou vae reta rami. Echa'ã che pomboe mbaembæ yavai'ã etei yaicuaa vaerã vae re. Chepuere'ã pomboe mbaembæ yavai yaicuaa vaerã vae re. Echa'ã jcuaeno pepuere'ã picuaa yavai vae. ³ Pe reta pepia pe piyemingueta jei vae rupiño yugüireco vae reta ipia pe uyemingueta rami. Echa'ã peacataa jare piyovaicho uyupii. Cua uicuaaca quirai pico upurugüirovia mbae vae reta yugüireco rami. Echa'ã jae reta yugüireco jei vae reño. ⁴ Echa'ã amocue pe reta pere: “Che co jae Pablo regua.” Jare ūru pe reta pere: “Che co jae Apolos regua.” Cua uicuaaca quirai pepia pe piyemingueta jei vae reño yugüireco vae reta ipia pe uyemingueta rami co.

⁵ Che mbae'ã co, jare Apolos mbae'ã co. Jaeño nduyeyocui yandeYa pe, pe reta perovia vaerã jese. Jare penti penti nduyapo mbaravíqui yandeYa umee oreve vae. ⁶ Che rani amimbeu peve ñee icavi vae perovia vaerã jare taicue rupi Apolos pembori picuaa cavi vaerã. Ërei Tumpa co jae pemimiräta pepurugüirovia re vae. Yamijaanga penti temiti. Che co jae temiti oñoti vae rami, jare Apolos co jae temiti umbiú vae rami. Ërei Tumpa etei umbicuacuaa temiti. ⁷ Jáeramo che mbae'ã co, yepe tẽi che co jae temiti oñoti vae rami. Jae ramíño vi Apolos mbae'ã co, yepe tẽi jae co temiti umbiú vae rami. Mbaravíqui Tumpa iparavíqui co. Echa'ã jae umbicuacuaa temiti. ⁸ Jare temiti oñoti vae jare temiti umbiú vae uparavíqui penti ramíño. Jare Tumpa umbiepita penti penti pe iparavíqui rupi. ⁹ Echa'ã ore nduparavíqui nduico Tumpa ndive. Pe reta co jae temiti Tumpa ico pe ñugüinói vae reta rami. Jae ramíño vi pe reta co jae penti tenta Tumpa uyapo oĩ vae rami. ¹⁰ Che co jae icatu tenta uyapo vae rami. Jare Tumpa umaeño cheré jae ipiacavi jeco pegua añono vaerã tenta iguapicarã. Jare ïru vae co jae tenta oñono oĩ iguapica iárambo vae rami. Ërei penti penti tuñemoa ngatu quirãi uparavíqui tenta iguapica iárambo. ¹¹ Echa'ã Jesucristo co jae tenta iguapica rami. Tentu iguapica uñeñono ma co. Mbaeti ye co ïru tenta iguapica. ¹² Tentu iyapoa reta ipuere oñono tenta iguapica iárambo oro jare corepoti jare ita ipõra ete vae, ani ipuere oñono ivira reta jare capii jare atiigüe. ¹³ Penti penti iparavíqui uyecuaata co

jocua ara Tumpa uicuaaca yave. Echa'ã jocua ara imeta co tata, jare tata uicuaacata mbae nunga mbaravíqui penti penti uyapo vae. ¹⁴ Mbaravíqui tenta iguapica iárambo uyeyapo vae ocai'ã yave, Tumpa umbiepita jocua mbaravíqui uyapo vae pe. ¹⁵ Mbaravíqui ocai yave, Tumpa ndarau umbiepi jocua mbaravíqui uyapo vae pe. Êrei mbaravíqui uyapo vae etei uyembiasacata co, penti cuimbae oyepo tata güi vae rami.

¹⁶ Picuua co quirãi pe reta co jae Tumpa jo jare quirãi Tumpa iEspíritu ico pepia pe. ¹⁷ Ime yave quía Tumpa jo urucumegua vae, jocua Tumpa umbaita. Echa'ã Tumpa jo uñeñono tee Tumpa peguarã. Pe reta co jae Tumpa jo.

¹⁸ Agüiye quía tuyembítavi. Ime yave quía ipia pe uyemingueta iyaracuua catu co aracuua ívi pegua re vae, tuicuua uicuaa cavi'ã co mbae. Jucuarãi uicuaa yave, añetete iyaracuua catuta co. ¹⁹ Echa'ã Tumpa uicuaaca quirãi aracuua cua ívi pegua mbae'ã co. Echa'ã Tumpa iñee pe uyecuatía oĩ cuarãi: “Tumpa umiamiri iyaracuua catu vae reta aracuua jae reta güinoi vae re.” ²⁰ Jare: “YandeYa uicuaa quirãi iyaracuua catu vae reta ipiayemingueta mbae'ã co.” Jucuarãi uyecuatía oĩ. ²¹ Jáeramo agüiye quía tuyembícate cuimbae reta re. Echa'ã Tumpa uyapo opaete mbaembae pembori vaerã. ²² Echa'ã Tumpa umee peve Pablo jare Apolos jare Cefas pembori vaerã. Umee vi peve mbaembae ívi pegua piporu vaerã. Jae ramíño vi umee peve tecove pico cavi vaerã, jare pemano yave icavita peve. Opaete añave uyeyapo vae jare opaete uyeyapota vae icavita peve. ²³ Jare pe

reta co jae Cristo imbae, jare Cristo co jae Tumpa imbae.

4

Uyeyocui reta Tumpa pe Tumpa jei vae rupi

¹ Oreré pepia pe piyemingueta yave, pemandúa cua re: Ore co jae Cristo jembiocui reta. Tumpa uicuaaca oreve jocua tenonde yave uyecuua mbae vae, ore nduicuaaca vaerā ūru vae reta pe. ² Jare penti upurumimbaraviquí vae jecuaeño uipota jembiocui uyapo vaerā jei vae. ³ Ërei pe reta cherāa yave ani ūru vae reta cherāa yave, mbae'ā co cheve. Che añaā'ā vi. ⁴ Yepe tēi aicuaa'ā co mbae ayembijeco jese vaerā, cua uipota'ā jei anoi'ā co teco. Echa'ā yandeYa co jae cherāa vae. ⁵ Jáeramo agüiye ñapuruāa añave. Peāro yandeYa ou ye regua. Echa'ā jae güeruta tembipe opaete mbaembae añave uñemi pítumimbi pe vae uyecuua cavi vaerā. Echa'ā yandeYa uicuaacata opaete vae ipiayemingueta. Jayave Tumpa umbiyeroviata penti penti. ⁶ Cherivi reta, cua moromboe amimbeu ma peve chiyee jare Apolos re, piyemboe vaerā cua pemingueta oreré vae rupi quirāi icavi'ā pembutuicha vaerā cuimbae retaño. Pepia pe piyemingueta cuimbae reta re uyecuatía oī vae rupiño. Jare agüiye pembutuicha penti vae ūru vae güi. Echa'ā jucuarāi piyapo yave, periro jocua ūru vae. ⁷ ¿Quía ra co jei nde icavi ete ūru vae güi? ¿Mbae ra co nenoi Tumpa umee'ā ndeve vae? Tumpa co umee ndeve opaete nenoi vae. Jáeramo ¿maera pa ndiyembicate? ¿Ndepia pe ndiyemingueta ra Tumpa umee'ā co ndeve?

⁸ Pe reta piyerovia iyangapii vae reta uyerovia rami. Jare piyembicate icocatu vae reta uyembicate rami. Jae ramio vi piyembicate mburuvicha reta uyembicate rami, jare pepia pe piyemingueta ndipo jucuarai piyeyapo ore pombori mbae reve. Erei tome piyeyapo mburuvicha ajetete vae retarai, ore vi ndoporoyocui vaerai pe reta ndive. ⁹ Ore co jae Cristo jemimondo reta. Erei chepia pe ayemingueta quirai Tumpa oreñono opaete vae jaicue. Ore co jae jocua cuimbae uyeparavo umano vaerai vae reta rami. Opaete vae umae orerai. Angel reta umae orerai, jare ivi pegua reta umae orerai. ¹⁰ Ore nduyeyocui Cristo pe ramo, iru vae reta orereni imbiquere vae reta. Erei pe reta pepia pe piyemingueta pearacuaa catu co Cristo re. Ore co jae ipirata mbae vae reta rami, jare pe reta co jae ipirata vae reta rami. Pe reta piyepiuca iru vae reta pe, erei iru vae reta orereriro. ¹¹ Jecuaeñor oriyembai jare oreue. Jecuaeñor uata oreve temimonde. Iru vae reta orenupa. Mbaeti co orerenta. ¹² Jecuaeñor orecandi nduparaviqui orepo pe. Iru vae reta uyepipeyu orerai, erei ore nduyerure Tumpa pe uyapo vaerai chupe reta icavi vae. Iru vae reta uyapo mbaembae icavi mbae vae oreve, erei ore orepiaguasu chupe reta. ¹³ Iru vae reta iyapu orerai, erei ore oremiari cavi chupe reta. Jecuaeñor iru vae reta oremombo ipite güi, iti jare icavi'a ma uyeporu vaerai vae uyemombo rami.

¹⁴ Aicuatia'a cuarai pumimaraca vaerai. Pe

reta co jae cheriví aau vae reta. Jáeramo cuarãi pumbiaracuaa. ¹⁵ Echa'ã yepe tẽi jocua pemboe Cristo re vae reta uyepapa diez mil, ërei jeta'ã co peru. Echa'ã che co jae peru mburugüirovia Cristo Jesús regua re. Echa'ã che amimbeu peve ñee icavi vae. ¹⁶ Jáeramo che pumiñera pico vaerã peechea che aico rami.

¹⁷ Cua jeco pegua amondo ma peve Timoteo. Jae co cheriví aau vae, jare jae uyeyocui cavi yandeYa pe. Jae pemimanduata co quirãi che aico Cristo re, jare quirãi cuarãi amboe opaete upurugüirovia vae uyembatimbati vae reta opaete que rupi. ¹⁸ Ërei amocue pepite pe ñugüinoi vae uyembutuicha, ipia pe uyemingueta tẽi ndarau ma aa pepi ramo. ¹⁹ Ërei aata imambaeño pepi, yandeYa uipota yave. Jare aa yave, aicuaata mbae ipuere uyapo jocua uyembutuicha vae reta. Ndaraus apirandu mbae ra jei reta. ²⁰ Echa'ã yayeyocui Tumpa pe yave, ñanõi mbaepuere. Yayeminguetaiño'ã. ²¹ ¿Mbae nunga ra pipota? ¿Pipota ra aa vaerã pepi aiporaraca peve vaerã? Ani ¿pipota ra añemimichi reve aicuaaca vaerã peve chepuruau?

5

Menda re uyuvanga vae uñeña

¹ Jeta vae uicuaa quirãi penti pepite pe oĩ vae güireco ichi-raanga. Jocua uyuvanga menda re vae mbae pichii ete vae uyapo. Echa'ã uicuaa'ã Tumpa vae reta umaeño'ã etei uyapo vaerã jucuarãi. ² Agüiyeta tẽi piyembicate mbae re. Pemara eteta tẽi ma cua re. Pemombota tẽi

pepite güi jocua cuimbae jucuarāi jeco vae.
³ Echa'ā yepe tēi che aīñā co pepi, ērei jecuaeño chepia pe ayemingueta peré, jare aāa ma jocua cuimbae jucuarāi jeco vae. Jucuarāi aāata tēi pepi aī yave. ⁴ Piyembati yave pembiadora vaerā yandeYa Jesús, pemandúa quirāi che chepia pe ayemingueta aī peré jare quirāi yandeYa Jesús imbaepuere penoita co. ⁵ Agüiye pemaeno jocua cuimbae re uyembati vaerā pe reta ndive. Jucuarāi imarata uyapo vae re, jare jecove uyembiasacata yandeYa ou ye yave.

⁶ Icavi'ā co piyembicate pico vaerā. Picuaa co jocua yae vae: "Mboviño levadura umbiayasi opaete masa uñemona vae." ⁷⁻⁸ Yamijaanga judío reta pascua pe uyapo vae. Echa'ā judío reta omombo mbiyape indechi vae levadura güinoi vae, jare fiesta uyapo yave jou mbiyape ipiau vae levadura güinoi mbae vae. Jae ramíño vi pe reta co jae mbiyape ipiau vae levadura mbaeti güinoi vae rami. Jáeramo agüiye ma yayapo icavi mbae vae yayapose vae. Echa'ā Cristo uyeyucaca yanderé, pascua pe maemimba reta uyeyucaca uñemee vaerā Tumpa pe rami. Jáeramo jecuaeño yayapo icavi vae añete vae rupi.

⁹ Che aicuatía peve ūru tupapire, jare joco pe che poyocui agüiye vaerā piñemíru aguasa uyapo vae reta ndive. ¹⁰ Poyocui'ā etei piyembiyao vaerā opaete cua iví pegua aguasa uyapo vae reta güi, jare ūru vae reta imbaembae uipota vae reta güi, jare ūru vae reta güi imbaembae upiro vae reta güi, jare tumpa-raanga reta umbiadora vae reta güi. Echa'ā jucuarāi piyapo yave, pepuereta'ā tēi

pico cua ivi pe. ¹¹ Êrei aicuatía co peve agüiye vaerã piñemiíru penti upurugüirovia vae jei iyupe vae ndive aguasa uyapo yave, ani ūru vae reta imbaembae uipota yave, ani tumpa-raanga reta umbiadora yave, ani icavi mbae vae japicha reta coti jei yave, ani jecuaeño usavipo yave, ani ūru vae reta güi imbaembae upiro yave. Agüiye etei pecaru jocua nunga ndive. ¹²⁻¹³ Echa'ã chepuere'ã etei aña upurugüirovia mbae vae reta. Tumpa uāata co jocua reta. Êrei pe reta penoi mbaepuere peña vaerã upurugüirovia vae reta. Jáeramo pembisiri pepite güi cuimbae jocua icavi mbae vae uyapo vae.

6

Ñeapo reta

¹ Ime yave quía pepite pe oĩ vae ūru vae mbae re umbijeco vae, icavi'ã co uñeapo vaerã ūru vae re upurugüirovia mbae vae reta pe. ¿Maera pa uñeapo'ã jese uñeñono tee Tumpa peguarã vae reta pe? ² ¿Picuaa'ã pa uñeñono tee Tumpa peguarã vae reta uāata co ivi pegua reta? Jáeramo ¿maera pa pepuere'ã pepuruña mbaembae yavai'ã ñapuruña jese vaerã vae re? Echa'ã pe reta peñata ivi pegua reta. ³ Picuaa co quirãi yande ñaāata ángel reta. Jáeramo ¿maera pa pepuere'ã pepuruña cua ivi pegua teco re? Echa'ã cua mbaembae yavai'ã co ñapuruña jese vaerã. ⁴ Jáeramo ime yave quía ūru vae cua ivi pegua teco re umbijeco vae, agüiye pemaeño upurugüirovia mbae vae reta re uāa vaerã. ⁵ Cuarãi jae pumimaraca vaerã. ¿Mbaeti pa co penti iyaracuaa catu vae pepite pe? ¿Mbaeti

pa quía pepite pe penti ñeapo ipuere uyapicatu vae? ⁶ Echa'ã upurugüirovia vae reta uñeapo iyee upurugüirovia mbae vae reta pe.

⁷ Êrei jucuarãi piñeapo piyee yave, penti teco tuicha vae co. Agüiye piñeapo piyee, yepe tẽi penti vae uyapo icavi mbae vae ūru vae pe ani penti vae umbitaví ūru vae. ⁸ Pe reta piyapo icavi mbae vae ūru upurugüirovia vae reta pe jare pembitaví ūru upurugüirovia vae reta.

⁹ Picuaa co quirãi jupi mbae vae reta ndarau ico Tumpa iporoyocuia pe. Agüiye piyembitaví. Aguasa uyapo vae reta, jare tumpa-raanga umbiadora vae reta, jare menda re uyuvanga vae reta, jare cuimbae uyupii uyereco vae reta, ¹⁰ jare imonda vae reta, jare ūru vae reta imbaembae uipota vae reta, jare usavipo vae reta, jare uepipeyu vae reta, jare ūru vae reta güi imbaembae upiro vae reta ndarau ico Tumpa iporoyocuia pe. ¹¹ Jare jucuarãi piyapose amocue pe reta. Êrei yandeRu Tumpa iEspíritu oyoe pegüi opaete cua mbaembae icavi mbae vae, jare peñono tee Tumpa peguarã, jare pembujupi. Cuarãi uyeyapo peve yandeYa Jesucristo jee re.

Pembiadora Tumpa perete pe

¹² Chepuere ayapo opaete aipota vae. Êrei icavi'ã opaete ayapo vaerã. Añete co, chepuere ayapo opaete aipota vae. Êrei ndarau che amaeñoca cheré mbae pe. ¹³ Tembíu yanderie peguarã co, jare yanderie tembíu pegua co. Êrei Tumpa umbaita co mocui reve. Êrei ñanoi'ã

yanderete yayapo vaerã aguasa. Ñanoi yanderete yayeyocui vaerã yandeYa pe, jare yandeYa ipuere umee yandeve opaete yanderete uipota vae. ¹⁴ Jare Tumpa umbijecove ye yandeYa güeru umanocue vae reta ipite güi. Jae ramiño vi umbijecove yeta yanderete güeru umanocue vae reta ipite güi imbaepuere pe.

¹⁵ Picuaa co perete co jae Cristo jete pegua. Jáeramo agüiye etei peya cuña iaguasapota vae re. ¹⁶ ¿Picuaa'ã pa quiräi cuimbae uñemíru penti cuña iaguasapota vae ndive vae uyeyapo pentiño jae ndive? Echa'ã Tumpa jei cuaräi: “Mocui reve uyeyapota penti ramiño.” Jucuaräi jei. ¹⁷ Ërei jocua uñemíru yandeYa ndive vae uyeyapo pentiño yandeYa ndive Espíritu Santo rupi.

¹⁸ Agüiye piyapo aguasa. Opaete ïru mbaeyoa piyapo vae piyapo'ã co perete pe. Ërei aguasa piyapo yave, perete cotí etei mbaeyoa piyapo. ¹⁹ ¿Picuaa'ã pa perete co jae Espíritu Santo ico pípe vae? Echa'ã Tumpa ombou peve Espíritu Santo, jare jae ico pepia pe. Jáeramo pe reta pico'ã ma piyupeguarã. ²⁰ Echa'ã Tumpa umbiepi jeta peré, peapo vaerã jae imbaerã. Jáeramo pembiadora Tumpa perete pe jare perecove pe. Echa'ã mocui reve Tumpa imbae co.

7

Menda regua

¹ Añave aipota aicuatía peve jocua mbaembæe picuatía cheve jese vae re. Icavi tẽi co cuimbae agüiye vaerã güireco cuña. ² Ërei agüiye vaerã piyapo aguasa, penti penti cuimbae tugüinói

jembirecoi jare penti penti cuña tugüinoi imei.
³ Cuimbae tuico jembireco ndive, uyupii reta icavi yugüireco vaerā vae rupi. Jae ramiño vi cuña tuico ime ndive, uyupii reta icavi yugüireco vaerā vae rupi. ⁴ Cuña ipuere'ã uyapo jete pei jae uipota uyapo vae rupi. Echa'ã jete ime imbae co. Jae ramiño vi cuimbae ipuere'ã uyapo jete pei jae uipota uyapo vae rupi. Jae jete jembireco imbae co. ⁵ Mocui reve pipota'ã pepoco piyee yave mbovi ara pegua piyerure vaerā Tumpa pe, icaviño jucuarāi piyapo. Ërei agüiye piyeeya ete. Taicue rupi pepoco ye piyee, agüiye vaerā Satanás pe perëgua pepuere'ã ma piyopia yave perete uipota vae güi. ⁶ Ërei cua che jae peve picuaa vaerā mbae icavi piyapo vaerā. Poyocui'ã co mbae re. ⁷ Ërei aipota tēi opaete cuimbae reta yugüireco vaerā che aico rami. Ërei penti penti güinoi Tumpa umee chupe vae. Jare Tumpa umee penti vae pe vae uyuavi umee ūru vae pe vae güi.

⁸ Jáeramo che jae ndeiño umenda vae reta pe jare ime umano vae reta pe cua: Icavi tēi co agüiye vaerā umenda, che amenda'ã rami. ⁹ Ërei ipuere'ã yave oyopia jete uipota vae güi, icavi co umenda vaerā. Echa'ã ipuere'ã yave uyapo jete uipota ete uyapo vae, uiporara eteta co. Jáeramo icavi co umenda vaerā.

¹⁰ Jare ayocui umenda vae reta cuarāi - ërei cheño'ã ayocui, echa'ã yandeYa vi oyocui cuarāi: Cuña agüiye tomombo ime. ¹¹ Ërei omombo yave ime, tuico umenda mbae reve, ani tuñatima ye ime pe tuico ye jae ndive. Jare cuimbae agüiye tomombo jembireco.

12 Êrei ūru reta pe che jae cua - mboroyocui yandeYa umee vae'ā co: Ime yave penti cuimbae upurugüirovia vae jare jembireco upurugüirovia'ā yave, jembireco uipota yave ico jae ndive, agüiye tomombo. **13** Jae ramiño vi ime yave penti cuña upurugüirovia vae jare ime upurugüirovia'ā yave, ime uipota yave ico jae ndive, agüiye tomombo. **14** Echa'ā cuimbae upurugüirovia mbae vae aramoi güiroviata Cristo re jembireco upurugüirovia vae jeco pegua. Jae ramiño vi cuña upurugüirovia mbae vae aramoi güiroviata Cristo re ime upurugüirovia vae jeco pegua. Jare uyemombo reta yave, isambiai reta ndarau ndipo güirovia Cristo re. Êrei uyemombo'ā reta yave, aramoi güiroviata Cristo re. **15** Êrei upurugüirovia mbae vae omombo yave upurugüirovia vae, cua mboroyocui amimbeu peve vae upurugüirovia vae peguarā'ā co. Echa'ā Tumpa yandeparavo yaico cavi vaerā yandepiacatu reve. **16** Echa'ā nde, cuña, ndicuaa'ā uyembiasacata ra neme ndereco pegua. Jae ramiño vi nde, cuimbae, ndicuaa'ā uyembiasacata ra nembireco ndereco pegua.

17 Êrei penti penti jecuaeño tuyapo mbaraviqui yandeYa umee chupe uyapo vaerā vae. Penti penti tuico, Tumpa ueni uyembiasaca vaerā yave ico rami. Jare jucuarāi ayocui opaete upurugüirovia vae uyembatimbatí vae reta. **18** Aramoi Tumpa ueni uñemicircuncidaca vae uyembiasaca vaerā. Tupita jucuarāiño. Jae ramiño vi aramoi Tumpa ueni uñemicircuncidaca mbae vae uyembiasaca vaerā. Agüiye tuñemicircuncidaca.

19 Ñañemicircuncidaca yave, mbae'ã co. Jae ramiño vi ñañemicircuncidaca'ã yave, mbae'ã co. Jaeño icavi yayapo vaerã Tumpa iporoyocui reta. **20** Penti penti jecuaeño tuico Tumpa ueni uyembiasaca vaerã yave ico rami. **21** Aramoi Tumpa ueni penti uyeyocui vae uyembiasaca vaerã. Agüiye tipiatiti jocua re. Ërei ipuere yave uyeyora ipatrón güi, icavi co uyapo vaerã. **22** Echa'ã yandeYa ueni yave uyeyocui vae uyembiasaca vaerã, yandeYa oyora ma opaete imbaeyoa güi. Jae ramiño vi yandeYa ueni yave uyeyocui mbae vae uyembiasaca vaerã, jae uyeyapo ma Cristo jembiocuirã. **23** Tumpa umbiepi ma perepi vaerã. Jáeramo piyeyocui chupe. **24** Cheriví reta, penti penti tuico Tumpa ueni uyembiasaca vaerã yave ico rami. Jucuarãi tuyeyocui Tumpa pe.

25 Añave taicuatía peve ndeiño umenda vae re. Anoi'ã mboroyocui yandeYa güi jesegua. Ërei che tupumbiaracuaa. Jare pepuere chererovia, yandeYa cheparareco ramo. **26** Jáeramo che jae icavi co penti cuimbae oĩ vaerã añave oĩ rami, cua ara reta pe yaiporara ramo. **27** Jocua cuimbae umenda ma vae agüiye tomombo jembireco. Jare jocua cuimbae ndeiño umenda vae, agüiye tueca jembirecorã. **28** Ërei umenda yave, iyoa'ã co. Jae ramiño vi cuñatai umenda yave, iyoa'ã vi co. Ërei yemipia'ã ivi pegua güinoita umenda vae reta, jare che aipota'ã piyemipia'ã vaerã jucuarãi.

29 Ërei che jae peve cua, cheriví reta: Mbaetita ma ima yaico vaerã. Jáeramo mbaeti ma tiempo jembireco güinoi vae reta uyemipia'ã ete vaerã

jembireco re. ³⁰ Jae ramiño vi mbaeti ma tiempo ipiatiti vae reta uyao vaerã. Jae ramiño vi mbaeti ma tiempo uyerovia vae reta upuca vaerã. Jae ramiño vi mbaembae ogua vae reta mbaeti ma güinoi tiempo opa vaerã uiporu imbaembae. ³¹ Jare mbaembae cua ivi pegua uiporu vae agüiye tuijota ete. Echa'ã mbaembae cua ivi pegua opata co.

³² Ërei aipota'ã mbae pemipi'a'ã vaerã. Cuimbae umenda mbae vae uyandareco yandeYa iparaviqui re. Echa'ã uipota umbiyerovia yandeYa. ³³ Ërei cuimbae umenda vae uyandareco mbaembae ivi pegua re. Echa'ã uipota umbiyerovia jembireco. ³⁴ Jae ramiño vi cuña ime reve vae uyuavi cuñatai ndeiño umenda vae güi. Echa'ã ndeiño umenda vae uyandareco yandeYa iparaviqui re. Echa'ã uipota jete jare jecove uñeñono tee vaerã Tumpa peguarã. Ërei umenda vae uyandareco mbaembae ivi pegua re. Echa'ã uipota umbiyerovia ime.

³⁵ Jare cua che jae peve icavi peve vaerã. Aipota'ã etei poyopia menda güi. Jaeno aipota piyapo vaerã jocua icavi piyapo vaerã vae, pepuere vaerã piyeyocui yandeYa pe piyemipi'a'ã mbae reve.

³⁶ Ërei penti cuimbae uicuaa yave uyapo'ã co jupi vae tayi ndeiño umenda vae coti - echa'ã aramoi tayi tairusu'ã ma jare uipota têi umenda. Tumaeño tayi re umenda vaerã. Jucuarai uyapo yave, iyoa'ã co. ³⁷ Ërei aramoi iru cuimbae ipia pe ipirata jare güinoi mbaepuere uyapo vaerã iquirêi uyapo vae yepe têi yavai chupe, jare jae ipia pe uyemingueta cavi tayi re agüiye vaerã umaeño

jese umenda vaerā. Jucuarāi yave, icavi uyapo.
³⁸ Jáeramo cuimbae umaeño tayi re umenda vaerā vae icavi uyapo. Ërei cuimbae umaeño'ā tayi re umenda vaerā vae icavi ete uyapo.

³⁹ Mboroyocui jei vae rupi cuña ime pegua co ime ico rambueve. Ërei ime umano yave, cuña ipuere umenda ye jae uipota vae ndive. Ërei tumenda cuimbae yandeYa re güirovia vae ndive.
⁴⁰ Ërei che jae icavi eteta co chupe umenda'ā ye yave. Jare aicuaa Tumpa iEspíritu chembiaracuaa che jae vaerā cuarāi.

8

Soo uñemee tumpa-raanga pe vae

¹ Añave taicuatía peve soo uñemee tumpa-raanga pe vae re. Añete co, opaete yaicuaa cua regua. Yaicuaaño yave yayembicate co, ërei yayerau yave ñañemimirāta co. ² Ime yave quía ipia pe uyemingueta iyee uicuaa co mbaembae, jae uicuaa'ā vîteño mbae uicuaata tēi vae. ³ Ërei ime yave quía uau Tumpa vae, Tumpa uicuaa cua nunga.

⁴ Jayave yayemingueta soo uñemee tumpa-raanga pe vae re. Yaicuaa co tumpa-raanga güinoi'ā co tecove. Jare yaicuaa vi Tumpa pentiño co. ⁵ Ime mbaembae ivi pegua reta umbijee tumpa vae. Cua mbaembae ñugüinoi ivi pe jare ara re. Jeta co jocua tumpa reta, jare jeta vi co ivi pegua iya reta. ⁶ Ërei yande yaicuaa ime co pentiño Tumpa. Jae co yandeRu. Jae uyapo opaete, jare yande yaico yambiadora vaerā. Ime vi co pentiño

yandeYa. Jae co Jesucristo. Jae vi uyapo opaete, jare jae umee yandeve tecove.

⁷ Êrei ime amocue cua regua uicuaa mbae vae. Echa'ã jae reta tenonde yave umbiadora tumpa-raanga, jare jecuaeño ipia pe uyemingueta quirai sooo jou vae uñemee co tumpa-raanga pe. Jáeramo jou yave, ipia pe uyemingueta têi mbae icavi mbae vae co uyapo oñ. Echa'ã ipirata'ã ipurugüirovia re.

⁸ Êrei yau yave, mbae'ã co Tumpa pe. Echa'ã yau yave, Tumpa ndarau jei mbae icavi vae co yayapo. Jare yau'ã yave, Tumpa ndarau jei mbae icavi mbae vae co yayapo. ⁹ Pepuere peu jocua nunga sooo. Êrei piñemoa agüiye vaerã cua piyapo vae rupi jocua ipirata'ã ipurugüirovia re vae uyapo mbae icavi mbae echa chupe vae. ¹⁰ Echa'ã nde ndicuaa cavi co cua regua. Êrei jocua ipirata'ã ipurugüirovia re vae nderecha yave ndeguapi neñ tumpa-raanga jo pe sooo ndeu vaerã, aramoi jae ipia pe uyeminguetata jae vi co ipuere jou sooo uñemee tumpa-raanga pe vae. ¹¹ Jáeramo ipirata'ã ipurugüirovia re vae opiate ndipo nde ndicuaa ndiyupe vae jeco pegua. Êrei jese vi co Cristo umano. ¹² Jáeramo jucuarai peyoa yave ūru upurugüirovia vae ipurugüirovia re ipirata'ã vae coti, Cristo coti peyoa vi co. Echa'ã jocua ūru upurugüirovia vae uyapo mbae ipia pe uyemingueta têi icavi'ã uyapo vaerã vae. ¹³ Jáeramo ūru upurugüirovia vae iyoa yave che jau vae jeco pegua, ndarau ye jau sooo, agüiye vaerã ūru upurugüirovia vae iyoa ayapo vae jeco pegua.

Temimondo ipuere uyapo vae

¹ Che vi chepuere ayapo che aipota vae rupi. Echa'ã che co jae penti temimondo. Che aecha yandeYa Jesús. Jare pe reta perovia yandeYa re che aparavíqui chupe ramo. ² Aramoí ūru vae reta jei'ã che co jae penti temimondo. Êrei pe reta picuaa cavi che co jae penti temimondo. Echa'ã pe reta perovia yandeYa re, jare cua uicuaaca che co jae penti temimondo.

³ Cua co che jae iñera cheré vae reta pe: ⁴ Orepure co ndou ipotave tembiú. ⁵ Nduipota yave, ore vi orepure numenda cuña upurugüirovia vae ndive jare ndugüiraa orerupié, ūru temimondo reta jare yandeYa tivi reta jare Pedro uyapo rami. ⁶ Aramoí pepia pe piyemingueta tēi jaeño Bernabé jare che orepure'ã nduico nduparavíqui mbae reve. ⁷ Ime yave quía oo uñeráro vaerá vae, omundo vae umbiepi co chupe. Uva oñoti vae jou co uva iacue. Jae ramiño vi ovecha reta re uyandareco vae jou co ovecha ineché. ⁸ Cua mbaembae che jae ivi pegua reta jei rami. Êrei jucuarai vi jei mboroyocui. ⁹ Echa'ã Moisés iporoyocui pe uyecuatía oñi cuarai: “Güeye trigo umbípiriri oñi yave, agüiye iyuruyocua.” Jucuarai uyecuatía oñi. Êrei Tumpa cua jei yave, jei'ã co güeye reta reño. ¹⁰ Jei vi oreré. Echa'ã ore co jae co pe uparavíqui vae reta rami. Umaeti vae jare trigo umbípiriri vae uáro pâve uyerovia reve. Echa'ã mocui reve uipota ucaru iparavíqui güi. ¹¹ Ore co jae umaeti vae rami. Echa'ã numimbeu peve mbaembae Espíritu pegua. Jae ramiño vi ore

co jae umbaeviro vae rami. Echa'ã yavaita'ã tēi peve ore nonoi vaerā mbaembae ïvi pegua jocua penoi vae güi. ¹² Íru vae reta ipuere yave güinoi mbaembae pegüi, orepuere eteta tēi chugüi reta. Ërei yepe tēi orepuere nonoi mbaembae pegüi, Ërei nduyerure'ã peve jese. Opaete numiaguanta, agüiye vaerā numbíavai ñee icavi vae Cristo regua. ¹³ ¿Picuaal'ã pa quirāi Tumpa jo pe uparavíqui vae reta jou tembíu Tumpa jo pegua? Echa'ã maemimba uyeyucacue Tumpa pe uñemeearenda pe vae uparavíqui vae reta jou maemimba uyeyucacue isoo. ¹⁴ Jae ramíño vi yandeYa oyocui íru vae reta umbiépi vaerā ñee icavi vae umimbeu vae reta pe. ¹⁵ Ërei che aipota'ã etei íru vae reta umbiépi vaerā cheve. Aicuatia'ã vi cua mbaembae peve, pe reta pembiépi vaerā cheve. Ayerovia cua chepuere jae peve vae re. Icavi ete co amano vaerā pe reta pembiépi cheve vaerāve.

¹⁶ Yepe tēi amimbeu ñee icavi vae, Ërei ayembicate'ã etei. Echa'ã yandeYa cheocui amimbeu vaerā. Amimbeu'ã yave ñee icavi vae, aramoi mbae icavi mbae vae uyeyapota cheve. ¹⁷ Echa'ã che ayapo yave cua mbaravíqui che etei aipota ramo, icavita tēi íru vae reta umbiépi vaerā cheve. Ërei ayapo cua mbaravíqui, yandeYa cheocui ayapo vaerā ramo. Jáeramo ñee icavi vae amimbeu yave, ayeyocui aí Tumpa pe. ¹⁸ Ayerovia ete quirāi amimbeu ñee icavi vae acovara mbae reve. Jare Tumpa umbiépi cheve cua yerovia anoi vae pe. Echa'ã yepe tēi amimbeu ñee icavi vae, jare yepe tēi icavi co íru vae reta umbiépi vaerā

ñee icavi vae umimbeu vae pe, ërei che aipota'ã ñru vae reta umbiepi vaerã cheve.

¹⁹ Jáeramo ñru vae reta ipuere'ã cheocui mbae ayapo vaerã. Ërei ayeyapo ma opaete vae jembiocuirã, jeta vae güirovia vaerã Cristo re chereco pegua. ²⁰ Judío reta ndive aico yave, che aico vi penti judío ico rami, judío reta güirovia vaerã Cristo re chereco pegua. Mboroyocui jei vae uyapo vae reta ndive aico yave, che aico vi penti mboroyocui jei vae uyapo vae ico rami, jae reta vi güirovia vaerã Cristo re chereco pegua. Cuarãi ayapo, yepe tẽi añave aico'ã ma mboroyocui jei vae re. ²¹ Moisés iporoyocui güinoi'ã vae reta ndive aico yave, che aico vi penti Moisés iporoyocui güinoi'ã vae ico rami, jae reta vi güirovia vaerã Cristo re chereco pegua. Cua uipota'ã jei aico'ã ma Tumpa iporoyocui re. Echa'ã che aico Cristo iporoyocui re. ²² Ipirãta'ã ipurugüirovia re vae reta ndive aico yave, che aico vi penti ipirãta'ã ipurugüirovia re vae ico rami, jae reta vi güirovia vaerã Cristo re chereco pegua. Jecuaeño ayemboyovaque penti penti ndive, amocue vae uyembiasaca vaerã chereco pegua. ²³ Jare opaete cua ayapo ñru vae reta güirovia vaerã ñee icavi vae, jae reta uñemíru vaerã che ndive.

²⁴ Pe reta picuaa co quirãi amocue vae uñençoci yave, opaete jae reta osi, ërei pentiño upurumiämiri jare güinoi upurumiämiri vae pe uñemee vae. Pico penoi vaerã upurumiämiri vae pe uñemeeta vae. ²⁵ Jare penti penti uipota upurumiämiri vae uyecuacu opaete mbaembae icavi'ã chupe vae güi. Jare jae reta jucuarãi uyapo

gǖinoi vaerā upurumiámiri vae pe uñemee vae ímambae icumegua vae. Êrei yande yaipota ñanoí mbae jaeño mai pegua icota vae. ²⁶ Jáeramo che aico penti uñeñocui vae s̄imi osi vae rami, mbaeti osiiño vae rami. Che aico penti uñerāro vae uipota upurumiámiri vae rami. ²⁷ Echa'ã aiporaraca cherete pe, uyapo vaerā che aipota uyapo vaerā vae, agǖiye vaerā che etei anoíã upurumiámiri vae pe uñemeeta vae, yepe t̄ei amimbeu ūru vae reta pe.

10

Tumpa-raanga regua

¹ Jare aipota picuua cavi vaerā, cheriví reta, quirái opaete Israel pegua reta yugüíraa jocua amapítu igüí pe, jare opaete jae reta uasa i guasu. ² Jare opaete vae uyeyapo pentiño Moisés ndive amapítu igüí pe yugüíraa yave jare i guasu uasa reta yave. ³ Jare opaete vae jou tembíu Espíritu Santo umee chupe reta vae. ⁴ Jare opaete vae jou i Espíritu Santo umee chupe reta vae. Jare opaete vae jou jocua ita Espíritu pegua jae reta jupíe oo vae güi. Jare jocua ita Cristo co. ⁵ Êrei Tumpa pochi jeta vae pe. Jáeramo opa uyucaca ueya ñana pe.

⁶ Jare Tumpa uechaca yandeve cua mbaembæ ueyeyapo chupe reta vae, agǖiye vaerā yande yaipota mbaembæ icavi mbae vae jae reta uipota vae rami. ⁷ Jáeramo agǖiye pembiadora tumpa-raanga, amocue jae reta umbiadora tumpa-raanga rami. Echa'ã Tumpa iñee pe uyecuatía oí cuarái: “Jae reta uguapi ucaru vaerā. Jayave upúa reta upirae vaerā.” Jucuarái uyecuatía oí.

⁸ Agüiye vi yayapo aguasa, amocue jae reta uyapo rami. Jare jucuarāi uyapo ramo, umano veintitrés mil jocua ara. ⁹ Agüiye vi yayapo icavi mbae vae yaicuaa vaerā tuicha ra yandeYa ipiaguasu. Echa'ā jucuarāi uyapo amocue jae reta, jare uyucaca reta mboi reta pe. ¹⁰ Agüiye vi piñeenguru yandeYa coti. Echa'ā jucuarāi uyapo amocue jae reta, jare Tumpa uyucaca penti ángel pe.

¹¹ Ërei Tumpa uechaca opaete cua mbaembae uyeyapo chupe reta vae, jare uyecuatía oī yanembiaracuaa vaerā. Echa'ā yande yaico ara taicuegua vae reta pe. ¹² Jáeramo ipia pe uyemingueta ipirāta co ipurugüirovia re vae tuñemoa ngatu agüiye vaerā iyoa. ¹³ Jecuaeño aña guasu pepiāro uyavica peve vaerā. Echa'ā jucuarāi uyapo opaete vae pe. Ërei jecuaeño pepuere perovia catu Tumpa pemberi vaerā. Echa'ā Tumpa ndarau umaeño perēgua ete vaerā aña guasu pe. Echa'ā aña guasu pepiāro yave, Tumpa uicuaacata peve quirāi pepuere piyapo agüiye vaerā peyoa, jare jucuarāi pepuereta pemiamiri aña guasu.

¹⁴ Jáeramo, cherivi reta, agüiye pembiadora tumpa-raanga. ¹⁵ Che jae cua peve, jare chepia pe ayemingueta pe reta co jae iyaracuaa vae reta. Pe reta etei pepuere picuaa añete ra cua che jae peve vae. ¹⁶ Ñamee yasurupai yandeYa pe jocua vino re. Vino uyemijaanga icavi vae yandeYa uyapo yandeve vae re. Jucuarāi yayapo yave, yaicuaaca quirāi yande ñaï pentiño Cristo ndive Cristo jugüi uyepiyere vae jeco pegua. Jae ramíño vi ñapissaa yave mbiyape, yaicuaaca quirāi yande ñaï pentiño

Cristo ndive Cristo jete umano vae jeco pegua. ¹⁷ Echa'ã yepe tẽi yande co jeta vae, õrei yande co jae Cristo jete pegua reta. Jáeramo yande ñaĩ penti rami. Echa'ã mbiyape pentiño co, jare opaete vae yau jocua mbiyape.

¹⁸ Yamijaanga Israel pegua reta. Jae reta jou maemimba uyeyucacue Tumpa pe uñemee vae isoo, jare jucuarãi uicuaaca quirãi jae reta uñemíru Tumpa ndive jocua maemimba uyeyucacue vae jeco pegua. ¹⁹ Aipota'ã etei jae penti tumpa-raanga co jae penti tumpa añetete vae. Aipota'ã vi jae soo tumpa-raanga pe uñemee vae ñru soo rami'ã co. ²⁰ Õrei che jae peve cua: Jocua reta umee maemimba uyeyucacue vae isoo aña reta pe. Umee'ã Tumpa pe. Jare aipota'ã piñemíru vaerã aña reta ndive. ²¹ Icavi'ã etei peu vaerã vino uyemijaanga yandeYa jugüi re vae vino aña reta pe uñemee vae ndive. Jae ramíño vi icavi'ã etei peu vaerã mbiyape uyemijaanga yandeYa jete re vae soo aña reta pe uñemee vae ndive. ²² Agüiye ñamíñemiro yandeYa aña reta pe. YandeYa ipuere ete co yandegüi.

Opaete mbae piyapo vae rupi pembiadora Tumpa

²³ Chepuere ayapo opaete aipota vae. Õrei icavi'ã opaete ayapo vaerã. Añete co, chepuere ayapo opaete aipota vae. Õrei opaete'ã yanembori ñanepirãta vaerã. ²⁴ Agüiye quía tuyapo jae uipota uyapo vaeño. Penti penti tuipota tombori ñru vae reta.

25 Pepuere peu ipotave soo mercado pe uñemee vae. Agüiye pepirandu uñemee ra tumpa-raanga pe. Echa'ã picuua yave, aramoi pepia pe piyeminguetata jupi'ã co peu vaerã. **26** Echa'ã cua ivi jare opaete ivi pegua co jae yandeYa imbae.

27 Penti upurugüirovia mbae vae uparea yave peve pecaru vaerã jae ndive, pipota yave peo, peu ipotave umee peve peu vaerã vae. Agüiye pepirandu uñemee ra soo tumpa-raanga pe. Echa'ã picuua yave, aramoi pepia pe piyeminguetata jupi'ã co peu vaerã. **28** Ërei aramoi uparea peve vae jeita peve: "Uyuca reta cua maemimba umee vaerã tumpa-raanga pe." Jucuarãi jei peve yave, agüiye peu umimbeu peve vae jeco pegua. Echa'ã aramoi jae ipia pe uyeminguetata jupi'ã co peu vaerã. **29** Añave chemiari aĩ ūru vae ipia pe uyemingueta jese vae re, pe reta pepia pe piyemingueta'ã jese vae re. Ërei aramoi pepia pe piyeminguetata cuarãi: "Ërei ¿maera pa ndere cheve chepuere'ã co jau soo ūru vae ipia pe uyemingueta jese vae jeco pegua? **30** Echa'ã jecuaeño che amee yasurupai Tumpa pe cherembíu re. Jáeramo ¿maera pa chembijeco jese? Echa'ã amee yasurupai Tumpa pe jese." Jucuarãi ndipo pepia pe piyemingueta. **31** Ërei che jae peve cua: Jecuaeño pembiadura Tumpa. Opaete mbaembae peu vae rupi jare opaete mbaembae piyapo vae rupi pembiadura Tumpa. **32** Agüiye piyapo icavi mbae echa ūru vae reta pe vae - judío reta pe, jare judío mbae vae reta pe, jare Tumpa uiparavo vae reta pe. Echa'ã piyapo yave, aramoi pembiavaita. **33** Jucuarãiño vi che ayapo opaete

mbaembae icavi echo opaete ūru vae reta pe vae. Aico'ā che ayembiyerovia vaeraño. Jaeño aipota ambori jeta ūru vae reta, jae reta uyembiasaca vaerā.

11

¹ Pico che aico rami. Echa'ā jecuaeño che aico Cristo uipota aico vaerā rami.

Cuña reta jemimonde

² Jare ayerovia peré, cheriví reta, quirāi jecuaeño pemandúa cheré, jare jecuaeño piyapo che amimbeu peve rami. ³ Ërei aipota picuua vaerā cua: Cuimbae reta uyeyocui Cristo pe, jare cuña reta uyeyocui ime pe, jare Cristo uyeyocui Tumpa pe. ⁴ Penti cuimbae uyerure Tumpa pe yave ani umimbeu Tumpa iñee ūru vae reta pe yave, uñeäcasoi reve, penti ñemimaraca co. ⁵ Ërei penti cuña uyerure Tumpa pe yave ani umimbeu Tumpa iñee ūru vae reta pe yave, uñeäcasoi mbae reve, penti ñemimaraca vi co. Echa'ā jae oyovaque cuña opaete iñāca uñeäpi vae ndive. ⁶ Cuña uñeäcasoi mbae vae tuñeäpi ía. Echa'ā penti ñemimaraca co cuña ía chutu ete yave ani opaete iñāca uñeäpi yave. Jáeramo cuña tuñeäcasoi. ⁷ Añete co, icavi'ā cuimbae uñeäcasoi vaerā. Echa'ā cuimbae uyemijaanga Tumpa re jare Tumpa yaruanda vae re. Ërei cuña uyemijaanga cuimbae yaruanda vae re. ⁸ Echa'ā Tumpa uyapo'ā cuimbae cuña güi. Uyapo cuña cuimbae güi. ⁹ Jae ramiño vi Tumpa uyapo'ā cuimbae cuña iñurā. Uyapo cuña cuimbae iñurā. ¹⁰ Jáeramo icavi co cuña uñeäcasoi vaerā uicuaaca vaerā uyeyocui co cuimbae pe, jare ángel

reta uecha vaerã. ¹¹ Ërei cuimbae ipuere'ã ico cuña mbae reve. Jae ramiño vi cuña ipuere'ã ico cuimbae mbae reve. YandeYa uyapo reta yugüireco vaerã penti rami. ¹² Añete co, Tumpa uyapo cuña cuimbae güi. Ërei cuimbae oa cuña güi. Jare Tumpa uyapo opaete.

¹³ Tapirandu peve cua re: ¿Icavi ra cuña uyerure vaerã Tumpa pe uñeäcasoi mbae reve? ¹⁴ Opaete vae yaicuaa quiräi penti cuimbae iavucu yave, penti ñemimaraca co. ¹⁵ Ërei penti cuña iavucu yave, iyaruandaca co. Echa'ã Tumpa umee cuña pe ía iñäca uyasoi vaerã. ¹⁶ Ërei ime yave quía uipota uyeaca cua re vae, tuicuaa quiräi ore nduyemboe jucuaräi. Jae ramiño vi upurugüirovia vae opaete que rupi uyembatimbati umbiadora vaerã Tumpa vae reta jucuaräi vi uyemboe.

Icavi mbae uyapo vae, yandeYa re imandúa yave

¹⁷ Ërei chepuere'ã ayerovia peré añave aicuatiata peve jese vae re. Echa'ã piyembati yave, piyapo icavi mbae vae, icavi vae piyapo vaeräve. ¹⁸ Cua rani tae peve: Jeräcua cheve quiräi piyembiyao piyugüi, piyembati yave pembiadura vaerã Tumpa. Jare chepiá pe ayemingueta aramoi añete co. ¹⁹ Echa'ã imeta co yembiyao reta pepite pe, añetete upurugüirovia vae reta uye cuaa vaerã pepite pe. ²⁰ Jáeramo piyembati yave pemandúa vaerã yandeYa re, añetete'ã co pemandúa yandeYa re tembiú peu yave. ²¹ Echa'ã amocue pe reta pembipi peu tembiú peru vae ndei ūru reta yugüeru mbove. Jáeramo penti vae iyembai, jare ūru vae usavipo. ²² Pipota yave pecaru cavi, pepuere

pecaru perenta pei. Agüiye períro ūru Tumpa uiparavo vae reta. Agüiye pemimaraca mbaeti mbae güinoi vae reta. ¿Mbae ra jaeta peve? ¿Ayeroviata ra peré cua jeco pegua? Ndarau etei co.

Pablo oporomboe quirāi yanemandúa vaerā yandeYa re

(Mt 26.26-29; Mr 14.22-25; Lc 22.14-20)

²³ Echa'ã yandeYa umimbeu cheve che amimbeu-yuapi ye peve vae. Jae co cua: YandeYa uipisi mbiyape jocua piare uñemeeta umano vaerā yave. ²⁴ Jayave yasurupai Tumpa pe umee yave, upisāa mbiyape jare jei: “Pipisi peu. Cua co jae cherete peré ameeta vae. Peu cua, pemandúa vaerā cheré.” Jucuarāi jei. ²⁵ Jae ramiño vi yandeYa uipisi copa opa ma ucaru reta yave, jare jei: “Cua vino co jae Tumpa jei piāu ye vae cherugüi pe ayapota vae. Peu ñave ñave, pemandúa cheré.” Jucuarāi jei. ²⁶ Echa'ã mbiyape jare vino peu ñave ñave, picuaacata quirāi yandeYa umano co, jare jucuarāi piyapota yandeYa ou ye regua.

²⁷ Jáeramo ime yave quía jou mbiyape jare vino yanemimandúa yandeYa re vae cua icavi mbae vae uyapo reve vae, iyoa co yandeYa jete jare jugüi coti. ²⁸ Ërei penti penti tuñeña ipia pe. Jayave tou jocua mbiyape jare jocua vino. ²⁹ Echa'ã ime yave quía jou mbiyape jare vino cua icavi mbae vae uyapo reve vae, uyembijeco jou ramo. Echa'ã uyandareco'ã yandeYa jete re. ³⁰ Cua jeco pegua jeta pepite pe ñugüinoi vae reta imbaerasi jare ipitu mbaerasi jeco pegua, jare jeta ma umano. ³¹ Echa'ã ñañeña yave, yandeYa ndarau

uiporaraca yandeve. ³² Êrei yaiporara yandeYa ñanenupa ramo, icavi vaerã yandeve, agüiye vaerã yayembijeco upurugüirovia mbae vae reta ndive.

³³ Jáeramo, cherivi reta, piyembañi yave pecaru vaerã, piñeraäro rani. ³⁴ Jare ime yave quía iyembai vae, tucaru rani jenta pe, agüiye vaerã yandeve uiporaraca peve, piyembañi yave. Jare opaete ūru mbaembae ayapicatuta aa pepi yave.

12

Mbaepuere reta Espíritu Santo umee vae

¹ Añave, cherivi reta, aipota amimbue peve mbaepuere reta Espíritu Santo umee vae regua. Aipota'ã pico vaerã picuua mbae reve.

² Picuua cavi quirãi ndei perovia yandeve re mbove, pembiadorase tumpa-raanga reta, piyemboe jese rami, yepe tẽi tumpa-raanga reta iñee'ã etei. ³ Jáeramo aipota picuua vaerã cua: Tumpa iEspíritu rupi piyemingueta yave, ndaraú piyepipeyu Jesús re. Jare jaeño Espíritu Santo rupi ipuere quía jei: “Jesús co jae cheYa.”

⁴ Jare mbaepuere Espíritu Santo umee vae reta uyuavi, ërei Espíritu Santo pentiño co. ⁵ Jare jocua mbaraviqui yayapo yayeyocui vaerã yandeve pe vae reta uyuavi, ërei yandeve pentiño co. ⁶ Jare yepe tẽi mbaraviqui yayapo vae reta uyuavi, Tumpa pentiño co, jare Tumpa umbupuere opaete vae opaete mbaraviqui reta uyapo vaerã.

⁷ Ërei Espíritu Santo umee mbaepuere penti penti pe, penti penti ipuere vaerã ombori ūru vae reta. ⁸ Echa'ã Espíritu Santo umee penti vae pe uyemingueta vaerã iyaracuua catu reve. Jare jae

etei umee ūru vae pe uyemingueta vaerā uicuaa cavi reve. ⁹ Jare Espíritu Santo umee ūru vae pe mburugüirovia. Jare jae etei umee ūru vae pe umbigüera vaerā imbaerasi vae reta. ¹⁰ Umee ūru vae pe uyapo vaerā miacañi reta, jare ūru vae pe umimbeu vaerā Tumpa iñee. Umee ūru vae pe uicuaa vaerā ou ra penti ñee Espíritu Santo güi ani ambie coti güi. Umee ūru vae pe uyemingueta vaerā ambiembie vae iñee reta pe, jare ūru vae pe umimbeu vaerā mbae uipota jei ambiembie vae iñee reta pe uyendu vae. ¹¹ Ërei pentiño co Espíritu Santo opaete cua mbaepuere reta güinói vae reta umbupuere vae. Jare jae umee mbaepuere uyuaví vae reta jae uipota vae rupi.

Cristo jete pegua reta pentiño co

¹² Echa'ã pentiño co yanderete. Ërei yanderete pe ñanói yandepi jare yandepo jare yandeapisa jare yanderesa jare jeta ūru ūru vae. Jare opaete yanderete pegua reta uyapo pentiño yanderete, yepe tēi jeta uyuaví vae co. Jae ramíño vi Cristo jete pegua reta pentiño co. ¹³ Echa'ã pentiño co Espíritu Santo jare jae yanembibautiza opaete, Cristo jete yayeyapo vaerā. Pentiño vi co Cristo jete. Jucuarái Espíritu Santo uyapo judío reta jare judío mbae vae reta pe. Jae ramíño vi jae uyapo uyeyocui vae reta jare uyeyocui mbae vae reta pe. Jare pentiño co Espíritu Santo cua uyapo yandeve vae.

¹⁴ Ime jeta yanderete pegua reta, pentiño'ã co. ¹⁵ Aramoi yandepi jeita: “Che ipo'ã co. Jáeramo che jete pegua'ã co.” Ërei yepe tēi jucuarái jeita, ërei yanderete pegua co. ¹⁶ Jae ramíño vi aramoi

yandeapisa jeita: “Che jesá co. Jáeramo che jete pegua'á co.” Êrei yepe tēi jucuarāi jeita, êrei yanderete pegua co. ¹⁷ Opaete yanderete yanderesa catuui yave, ndarau tēi yandepuere mbae yayandu. Jae ramiño vi opaete yanderete yandeapisa catuui yave, ndarau tēi yandepuere mbae ñaetu. ¹⁸ Êrei Tumpa oñono penti penti yanderete pegua reta yanderete pe jae uipota vae rupi. ¹⁹ Jare ime yave pentiño yanderete pegua, ndarau tēi yanderete. ²⁰ Êrei ime co jeta yanderete pegua reta, êrei pentiño co yanderete.

²¹ Jare yanderesa ipuere'á jei yandepo pe: “Che aipota'á nde chembori vaerā.” Jae ramiño vi ñaneäca ipuere'á jei yandepi pe: “Che aipota'á nde chembori vaerā.” ²² Añete, jucuarāi'á co. Echa'á yanderete pegua reta iparavíqui'á echa vae uparavíqui ete co. ²³ Jare yanderete pegua reta icavi'á echa yandeve vae ñamopõra. Jae ramiño vi yanderete pegua reta ñanemara jese vae yamiemonde cavi.

²⁴ Êrei yanderete pegua reta icavi tēi yandeve vae ñamopõra'á. Êrei Tumpa umbiyuapiyuapi opaete yanderete pegua reta, jare uipiúca jocua yanderete pegua yande yaipiú'á vae reta. ²⁵ Jucuarāi uyapo, agüiye vaerā yanderete pegua reta uyembiyao uyugüi, opaete yanderete pegua reta uyandareco cavi vaerā iyee. ²⁶ Jare penti yanderete pegua uiporara yave, opaete yanderete pegua reta uiporara pâve. Jae ramiño vi penti yanderete pegua uyepiúca yave, opaete yanderete pegua reta uyerovia pâve.

²⁷ Jare pe reta co jae Cristo jete, jare penti

pentí co jae Cristo jete pegua. ²⁸ Jare Tumpa oñono amocue vae upurugüirovia vae reta ipite pe temimondo retarã yugüireco vaerã. Oñono vi ūru vae reta Tumpa iñee umimbeu vaerã. Oñono vi ūru vae reta omboe vaerã upurugüirovia vae reta. Oñono vi ūru vae reta uyapo vaerã miacañi reta, jare ūru vae reta umbigüera vaerã imbaerasi vae reta, jare ūru vae reta ombori vaerã ūru upurugüirovia vae reta, jare ūru vae reta ipuere vaerã oyocui ūru upurugüirovia vae reta, jare ūru vae reta uyemingueta vaerã ambiembie vae iñee reta pe. ²⁹ Opaete'ã co temimondo reta vae. Opaete'ã vi co Tumpa iñee umimbeu vae reta. Opaete'ã vi co upurugüirovia vae reta omboe vae reta. Opaete'ã vi co miacañi reta uyapo vae reta. ³⁰ Opaete'ã vi co imbaerasi vae reta umbigüera vae reta. Opaete'ã vi co ambiembie vae iñee reta pe uyemingueta vae reta. Opaete'ã vi co mbae uipota jei ambiembie vae iñee reta pe uyendu vae umimbeu vae reta. ³¹ Êrei pipota ete penoi vaerã mbaepuere icavi ete ūru reta güi vae reta. Êrei amimbeuta peve mbae icavi ete cua mbaembae reta güi vae.

13

Mburuau icavi ete

¹ Aramoi chepuere ayemingueta ambiembie vae iñee reta pe jare ángel reta iñee pe. Êrei apuruau'ã yave, che jae vae mbae'ã co, jare ayeyapo campana ipu rami ani temimbi iñee rami. ² Jare aramoi ime anoi mbaepuere Tumpa iñee amimbeu cavi vaerã. Jare aramoi aicuaa mbaembae ūru vae reta pe uyecuaa mbae vae jare

mbaembiae ūru vae reta uicuaa mbae vae. Jare aramoi ime anoi mburugüirovia tuicha ete vae chepuere vaerā ambisiri ivitū guasu reta. Êrei apuruau'ā yave, che mbae'ā co. ³ Jare aramoi ameeta opaete chembaembiae amingaru vaerā iparavete vae reta. Jare aramoi ameeta cherete etei amano vaerā tata pe. Êrei apuruau'ā yave, mbae'ā co cheve.

⁴ Yapuruau yave, yandepiaguasu jare yandepiacavi ūru vae reta pe. Yapuruau yave, yaipota'ā ūru vae reta imbaembiae, yayemitenonde'ā, yayembicate'ā, ⁵ yayapo'ā icavi mbae vae, yaipota'ā mbae yandeyupeguarāñō, yandearasi'ā, yanemandua'ā icavi mbae vae ūru vae reta uyapo yandeve vae re, ⁶ yayerovia'ā ūru vae reta iyoa yave, ñrei yayerovia añete vae re. ⁷ Yapuruau yave, ñamiaguanta opaete yapurugüirovia reve, jare ñaāro yandepiaguasu reve.

⁸ Mburuau ndarau etei opa. Êrei mbaepuere Tumpa iñee umimbeu vaerā ñanoi vae opata co. Jae ramiñō vi mbaepuere ambiembie vae iñee reta pe yayemingueta vaerā ñanoi vae opata co. Jare mbaepuere mbaembiae yaicuaa vaerā ñanoi vae opata co. ⁹ Echa'ā mboviñō co jocua yaicuaa vae, jare Tumpa iñee yamimbeu yave mboviñō vi co jocua yamimbeu vae. ¹⁰ Êrei opaete uyecuaa yave, jocua mboviñō vae opata co.

¹¹ Che chemichi yave, ayemingueta penti sambiai uyemingueta rami, jare aicuaa penti sambiai uicuaa rami, jare chepiá pe ayemingueta penti sambiai ipia pe uyemingueta rami. Êrei acuacuaa ma yave, ayapo'ā ma penti sambiai uyapo rami.

¹² Ñamae yave yanderova re espejo pe, yayeecha cavi'ã. Jucuaräño vi añave yaicuaa cavi'ã mbaembae regua. Ërei ñamae yave ūru vae re coiño güi, yaeecha cavi. Jucuaräño vi penti ara yaicuaa cavita mbaembae regua. Echa'ã añave mboviño aicuaa. Ërei jocua ara aicuaata opaete, Tumpa checuaa rami. ¹³ Ërei jecuae yapurugüiroviata, jare ñaärota yayerovia reve, jare yapuruauta. Ërei mburuau icavi ete cua ūru mocui güi.

14

Ambiembie vae iñee reta

¹ Jecuaeño pepuruau. Jare penoi quirëi pipota vaerã mbaepuere Espíritu Santo umee vae reta. Ërei pemitenonde mbaepuere Tumpa iñee pepuere pemimbeu vaerã. ² Echa'ã ambiembie vae iñee reta pe uyemingueta vae uyemingueta Tumpa pe, ūru vae reta pe'ã. Echa'ã quía uicuaa'ã mbae jei vae. Jae uyemingueta Espíritu Santo rupi uyecuaa mbae vae re. ³ Ërei Tumpa iñee umimbeu vae uyemingueta ūru vae reta pe, umimiräta jare umbiaracuaa jare umbipiácatu vaerã. ⁴ Ambie vae iñee pe uyemingueta vae jaeño uñemimiräta. Ërei Tumpa iñee umimbeu vae umimiräta ūru upurugüirovia vae reta.

⁵ Che aipota opaete pe reta piyemingueta vaerã ambiembie vae iñee reta pe. Ërei aipota ete pemimbeu vaerã Tumpa iñee. Echa'ã Tumpa iñee umimbeu vae uyeyocui ete ūru upurugüirovia vae reta pe ambiembie vae iñee reta pe uyemingueta vae güi. Ërei ambiembie vae iñee reta pe

uyemingueta vae umimbeu yave mbae uipota jei ambiembie vae iñee reta pe uyandu vae, uyeyocui vi ūru upurugüirovia vae reta pe. Echa'ā umimbeu yave, umimirāta ūru upurugüirovia vae reta. ⁶ Jáeramo, cheriví reta, che aa yave pepi, jare ayemingueta yave ambiembie vae iñee reta pe, ndarau etei mbae icavi vae ayapo peve, aicuaaca'ā peve yave Tumpa uicuaaca cheve vae, ani amimbeu peve mbae aicuaa vae, ani Tumpa iñee, ani pomboe mbae re.

⁷ Yamijaanga mbaembae tecove güinói mbae vae ipu vae. Temimbi ñamíñee yave ani miori yambopu yave, yambopu cavi'ā yave, ndarau quía uicuaa mbae nunga canta ra ipu oī vae.

⁸ Picuaa co quirái sundaro reta uñerárota yave, penti temimbi uñee sundaro reta uyeyapícatu uñeráro vaerã. Ërei uñee cavi'ā yave temimbi, ndarau quía uyeyapícatu uñeráro vaerã. ⁹ Jae ramiño vi pe reta piyemingueta'ā yave ñee ūru vae reta ipuere uicuaa cavi vae pe, ndarau quía uicuaa mbae pere vae. Piyemingueta yuvangaiño.

¹⁰ Añete co, ime jeta ñee uyuaví vae reta cua iví pe, jare opaete vae uicuaa iñeeñeei. ¹¹ Jáeramo aicuaa'ā yave ūru vae iñee, ayemingueta chupe yave, jae uicuaata che co jae ambie iví pegua, jare jae uyemingueta cheve yave, che aicuaata jae co ambie iví pegua. ¹² Jae ramiño vi pe reta pipota ete penoi vaerã mbaepuere Espíritu Santo umee vae reta. Jáeramo pipota ete jocua mbaepuere pipe ūru upurugüirovia vae reta pepuere pemimirāta vae reta.

¹³ Jáeramo ambie vae iñee pe uyemingueta vae tuyerure Tumpa pe ipuere vaerã umimbeu mbae

uipota jei ambie vae iñee pe uyandu vae. ¹⁴ Echa'ã che ayerure yave Tumpa pe ambie vae iñee pe, aicuaa'ã che jae vae. Echa'ã cheespirituño co uyerure. ¹⁵ Jáeramo Ɂmbae ra ayapota? Cheespíritu uyerure reve ayerureta Tumpa pe, jare ayerureta Tumpa pe aicuaa reve vi. Jae ramíño vi cheespíritu ucanta reve acantata, jare acantata aicuaa reve vi. ¹⁶ Echa'ã nde nemee yave yasurupai Tumpa pe ndeespíritu peño, ñee ndiyemingueta pipe vae uicuaa mbae vae ndarau ipuere uñemíru nde ndive, yasurupai Tumpa pe nemee yave. Echa'ã uicuaa'ã mbae ndere vae. ¹⁷ Añete co, icavi ete nde nemee yasurupai Tumpa pe, ñrei jocua ñru vae nemimirāta'ã pipe. ¹⁸ Che amee yasurupai Tumpa pe quirāi jeta ete ayemingueta ambiembie vae iñee reta pe opaete pe reta güi. ¹⁹ Ñrei ayembati yave ñru upurugüirovia vae reta ndive, aipota ete jae pandepo ñeeño aicuaa reve amboe vaerā ñru vae reta, diez mil ñee ambie vae iñee pe jae vaeräve.

²⁰ Cheriví reta, agüiye pepia pe piyemingueta sambiai reta ipia pe uyemingueta rami. Agüiye piyapo icavi mbae vae, sambiai-rai reta uyapo'ã icavi mbae vae rami. Ñrei pepia pe piyemingueta mbaembae re ucuacuaa vae reta ipia pe uyemingueta rami. ²¹ Mboroyocui pe uyecuatía oĩ cuarāi: “Ayeminguetata cua ivi pegua reta pe ambie ivi pegua reta iñee pei uyemingueta vae rupi. Ñrei jeseve ndarau uyapisaca cheré”—jei yandeYa. Jucuarāi uyecuatía oĩ. ²² Jáeramo ambiembie vae iñee reta pe yayemingueta yave, yaicuaaca Tumpa imbaepuere upurugüirovia mbae vae reta pe, upurugüirovia vae reta pe'ã.

Êrei Tumpa iñee yamimbeu yave, yaicuaaca upurugüirovia vae reta pe, upurugüirovia mbae vae reta pe'ã. ²³ Jáeramo opaete pepurugüirovia vae reta piyembati yave, opaete pe reta piyemingueta yave ambiembie vae iñee reta pe, jare uique yave pepite pe cua nunga ñee reta uicuaa mbae vae reta ani upurugüirovia mbae vae reta, jae reta jeita pembiqquere co. ²⁴ Êrei opaete pe reta pemimbeu yave Tumpa iñee, jare uique yave pepite pe penti upurugüirovia mbae vae ani penti uicuaa mbae vae, jae uicuaata iyugüi quiräi jae co iyoa vae jare uñeäata, uyandu yave opaete pe reta pere vae. ²⁵ Jare jucuaräi uyecuaata chupe opaete ipia pe oĩ vae, jare ueyeaticata umbiadora reve Tumpa, jare jeita quiräi añetete Tumpa ico pepite pe.

Piyapo cavi opaete mbiacatu reve

²⁶ Jáeramo, cherivi reta, ¿mbae ra yaeta? Piyembati yave, penti penti pipota pembiadadora Tumpa pecanta reve, ani pipota peporomboe, ani pipota piyemingueta ambiie vae iñee pe, ani pipota picuaaca íru reta pe Tumpa uicuaaca peve vae, ani pipota pemimbeu mbae uipota jei ambiie vae iñee pe uyendu vae. Piyapo opaete piñemimiräta vaerä. ²⁷ Ime yave quía reta uipota tuyemingueta ambiembie vae iñee reta pe vae, tuyemingueta mocui ani mbapiño, jare tuñeraäro tuyemingueta, jare penti vae tumimbeu mbae uipota jei ambiembie vae iñee reta pe uyendu vae. ²⁸ Êrei joco pe oĩ'ã yave mbae uipota jei ambiembie vae iñee reta pe uyendu vae ipuere umimbeu vae, agüiye quía tuyemingueta ambiie vae iñee pe

uyembatia pe. Jaeño ipuere uyemingueta iyupe jare Tumpa pe ambie vae iñee pe. ²⁹ Jae ramiño vi tuyemingueta mocui ani mbapí Tumpa iñee umimbeu vae reta, jare uyapisaca jese vae reta ipia pe tuyemingueta icavi ra jocua uyandu vae. ³⁰ Êrei Tumpa uicuaaca yave mbae ūru vae uguapi oĩ vae pe, uyemingueta oĩ vae tiqui. ³¹ Echa'ã jucuarai opaete pe reta pepuere pemimbeu Tumpa iñee penti penti rupi, opaete vae piyemboe vaerã jare piyembipiacatu vaerã. ³² Jare Tumpa iñee umimbeu vae reta ime mbaepuere güinoi uñleraño vaerã. ³³ Echa'ã Tumpa uipota opaete piyapo vaerã mbiacatu reve. Uipota'ã piyapo vaerã tecorai piyembatia pe. Echa'ã jucuarai Tumpa uipota opaete uñeñono tee Tumpa peguarã vae reta uyembatimbatia pe.

³⁴ Piyembati yave, tiqui toĩ cuña reta. Echa'ã ñamaeño'ã jese reta oporomboe vaerã. Penti penti tuyapo ime jei vae. Echa'ã jucuarai jei mboroyocui. ³⁵ Jare ime yave mbae cuña uipota uicuaa vae, tupirandu ime pe jenta pe. Echa'ã piyembatia pe cuña reta uyemingueta yave, penti ñemimaraca co.

³⁶ Pemandúa quirai pe reta rani'ã co pemimbeu Tumpa iñee, jare pe retaño'ã co piyandu Tumpa iñee. ³⁷ Aramoi quía ipia pe uyemingueta iyee jae co penti Tumpa iñee umimbeu vae ani mbaepuere Espíritu Santo umee vae güinoi vae. Jocua nunga tuicuaa quirai cua mbaembae aicuatía peve vae yandeYa iporoyocui reta co. ³⁸ Êrei uipota'ã yave uicuaa, tupita uicuaa mbae reve.

³⁹ Jáeramo, cherivi reta, penoi quiréi pipota vaerã pemimbeu Tumpa iñee, jare agüiye piyopia

uiptota uyemingueta ambiembie vae iñee reta pe vae. ⁴⁰ Ërei piyapo cavi opaete mbiacatu reve.

15

Cristo icove ye ou umanocue vae reta ipite güi

¹ Añave, cherivi reta, aipota pumimandúa ñee icavi vae amimbeu peve vae re. Echa'ã pe reta perovia cua ñee icavi vae jare pepiräta jese. ² Jare piyembiasaca ñee icavi vae rupi pemandúa yave amimbeu peve vae re, añetete pegua pepurugüirovia yave.

³ Echa'ã cua rani amimbeu peve, quiräi Cristo umano yanembaeyoa reta re, cuaräi Tumpa iñee pe uyecuatía oĩ rami. Cua co uyecuaaca cheve vae. ⁴ Amimbeu vi peve quiräi Cristo uñeñoti jare mbapi ara rupi icove ye ou umanocue vae reta ipite güi, cuaräi Tumpa iñee pe uyecuatía oĩ rami. ⁵ Jocua jaicue rupi uyecuaaa Pedro pe, jare jocua rendave pe uyecuaaa jocua doce vae pe. ⁶ Jocua rendave pe uyecuaaa jeta upurugüirovia vae reta yati vae pe. Jocua reta quinientos uasa. Jare jeta jocua reta imeño co ñugüinói. Ërei amocue umano ma. ⁷ Jocua rendave pe uyecuaaa Jacobo pe, jare joco güi uyecuaaa opaete temimondo reta pe.

⁸ Jare taicue ete uyecuaaa cheve vi. Che co jae penti sambiai ocua seri vae echa rami. ⁹ Echa'ã che co jae penti temimondo, ërei opaete ūru temimondo reta uyepiuca chegüi. Jupi'ã ayembijee vaerä temimondo pe. Echa'ã che ayapose icavi mbae vae Tumpa ui paravo vae reta pe. ¹⁰ Che co jae penti temimondo Tumpa ipiacavi rupi. Jare ipiacavi umee cheve vae ucañi'ã etei. Echa'ã che

aparavíqui tanta ete opaete ūru reta güi. Êrei chei'ã co aparavíqui. Tumpa ipiacavi umee cheve vae chemimbaravíqui. ¹¹ Aicuaa'ã quía ra umimbeu peve quirãi Cristo icove ye ou umanocue vae reta ipite güi, che ani ūru reta. Êrei jucuarãi numimbeu, jare jucuarãi pe reta perovia.

Umanocue vae reta icove yeta co

¹² Jáeramo ¿maera pa jei amocue pepite pe ñugüinoi vae mbaeti quía ipuere icove ye ou umanocue vae reta ipite güi? Echa'ã ore numimbeu peve quirãi Cristo icove ye co ou umanocue vae reta ipite güi. ¹³ Êrei mbaeti yave quía ipuere icove ye ou umanocue vae reta ipite güi, Cristo vi icove yeta'ã tẽi ou umanocue vae reta ipite güi. ¹⁴ Jare Cristo icove ye'ã yave ou umanocue vae reta ipite güi, cua numimbeu peve vae mbaetita tẽi co mbae, jare pepurugüirovia vi mbaetita tẽi co mbae. ¹⁵ Jare jucuarãi yave, oreaputa tẽi Tumpa re. Echa'ã ore numimbeu quirãi Tumpa umbijecove ye Cristo güeru umanocue vae reta ipite güi. Êrei quía ipuere'ã yave icove ye ou umanocue vae reta ipite güi, Tumpa umbijecove yeta'ã tẽi Cristo güeru umanocue vae reta ipite güi. ¹⁶ Echa'ã quía ipuere'ã yave icove ye ou umanocue vae reta ipite güi, Cristo icove yeta'ã tẽi ou umanocue vae reta ipite güi. ¹⁷ Jare Cristo icove ye'ã yave ou umanocue vae reta ipite güi, pepurugüirovia mbaetita tẽi co mbae, jare uyembaita'ã tẽi pemberayo reta. ¹⁸ Jae ramiño vi, jucuarãi yave, Cristo re güirovia vae reta umano ma vae ucañiteita tẽi co. ¹⁹ Cua ivi pe ñaĩ rambueve ñaño

tēi yave yayerovia reve Cristo re, yandepiatiti eteta tēi upurugüirovia mbae vae reta güi.

20 Êrei yaicuaa Cristo icove ye co ou umanocue vae reta ipite güi. Jae rani icove ye ou umanocue vae reta ipite güi, uicuaaca vaerã opaete umanocue vae reta icove yeta co. **21** Echa'ã mano uique cua ivi pe penti cuimbae mbaeyoa uyapo vae jeco pegua. Jae ramíño vi umanocue vae reta icove yeta íru cuimbae uyapo vae jeco pegua. **22** Echa'ã Adán co jae opaete vae itenondegua. Jáeramo opaete vae umano. Jae ramíño vi yande yaico Cristo re. Jáeramo opaete yaicove yeta co. **23** Cristo rani icove ye. Êrei Cristo ou ye yave, opaete güirovia Cristo re vae reta icove yeta. **24** Jare taicue ete opata co opaete, Cristo uequi ma yave imbaepuere opaete mburuvicha reta ara pegua jare ivi pegua jare ipotave mbaepuere güinói vae güi, jare umee ma yave iporoyocuia Tumpa pe - jae co yandeRu. **25** Echa'ã Cristo oyocuita co opaete ivi pegua reta, umiamiri opaete jovaicho reta regua. **26** Jare taicue ete Cristo umbaita mano. **27** Echa'ã Tumpa umee ma Cristo pe mbaepuere umiamiri vaerã opaete. Echa'ã jucuarãi jei Tumpa iñee pe uyecuatía oĩ vae. Êrei cua opaete jei vae uipota'ã jei Tumpa etei. Echa'ã Tumpa umee mbaepuere Cristo pe. **28** Jare Tumpa Tai umiamiri ma yave opaete, jae etei uyeyocuita Tumpa pe. Echa'ã Tumpa umee chupe mbaepuere umiamiri vaerã opaete. Jayave Tumpa oyocuita opaete.

29 Jare amocue vae uyembibautizaca umanocue vae reta ipepiça pe. ¿Maera ra uyapo reta jucuarãi?

Echa'ã ndarau icove ye yave umanocue vae reta, ¿maera ra uyembibautizaca umanocue vae reta ipepica pe?

³⁰ Jare ¿maera ra orequirëi nduiporara nduico opa ara rupi? ³¹ Opa ara ūru vae reta uipota cheyuca. Cua añete co, cherivi reta, yerovia anoi peré vae añete rami. Echa'ã ayerovia peré yandeYa Jesucristo re. ³² Yandepuere yae yamijaanga reve cheañeráro maemimba pochi vae reta ndive Efeso pe. Ërei ¿mbae pe ra icavi cheve? Umanocue vae reta ndarau icove ye yave, yandepuere yae: “Yayecou. Echa'ã piareve ñamanota co.”

³³ Agüiye petavi. Pochi vae reta ndive ñañemíru yave, jae reta yanembopochi vi. ³⁴ Piyerova Tumpa coti piyapo vaerä jupi vae. Agüiye ma peyoa. Echa'ã amocue pe reta picuaa'ã Tumpa. Cua jae peve pemara vaerä.

¿Quiräita ra icove ye umanocue vae reta?

³⁵ Ërei aramoi quía jeita: “¿Quiräita ra icove ye umanocue vae reta? Jare ¿mbae nunga jete ra güinoita?” ³⁶ Jucuaräi jei vae iyaracuaa'ã co. Echa'ã penti temiti jääcue ñañotí yave, umano co jeñi vaerä. ³⁷ Jare jocua ñañotí vae oyovaque'ã co temiti ucuacuaa ma vae ndive. Ñañotí jääcueño, aramoi trigo jääcue ani ūru temiti jääcue. ³⁸ Ërei Tumpa umbicuacuaa, temiti oï vaerä Tumpa jei vae rupi. Jare Tumpa umbuyuaví opaete temiti reta. ³⁹ Jae ramiño vi oyovaque'ã opaete jete. Echa'ã ime cuimbae jete, jare maemimba jete, jare jevae i rupigua jete, jare güira jete. Opaete uyuavi uyugüi. ⁴⁰ Jae ramiño vi ime mbaembæ ara re

ñugüinoi vae, jare ime mbaembae ivi pe ñugüinoi vae. Mbaembae ara re ñugüinoi vae ipõra. Jare mbaembae ivi pe ñugüinoi vae ipõra. Ërei ipõra vae pe uyuaví uyugüi. ⁴¹ Ipõra co guarasi jare yasi jare yasitata reta. Ërei ipõra vae pe uyuaví uyugüi. Jae ramiño vi opaete yasitata reta ipõra vae pe uyuaví uyugüi. ⁴² Jucuaräita vi uyeyapo, umanocue vae reta icove ye yave. Echa'ã uñeñoti yave, umano vae jetecue icumegua. Ërei icove ye yave ndarau etei icumegua. ⁴³ Uñeñoti yave, mbaeti co mbae yaipiú vaerã. Ërei icove ye yave, ipõra eteta co. Uñeñoti yave, güinoi'ã etei mbaepuere. Ërei icove ye yave, ipiräta eteta co. ⁴⁴ Umano vae jetecue uñeñoti yave, ivi pegua co. Ërei icove ye yave, ara pegua co. Ime co jete ivi pegua. Jae ramiño vi ime jete ara pegua.

⁴⁵ Echa'ã Tumpa iñee pe uyecuatía oĩ cuaräi: “Tumpa umee tecove cuimbae tenondegua vae pe - jae co Adán. Jocua Adán taicuegua vae - jae co Cristo - tecove ara pegua umee vae co.” Cuaräi uyecuatía oĩ. ⁴⁶ Ërei ara pegua tenonde'ã oĩ. Jocua ivi pegua tenonde oĩ, jare taicue oĩ ara pegua. ⁴⁷ Cuimbae tenondegua vae ivi pegua co. Echa'ã Tumpa uyapo ivi güi. Ërei cuimbae taicuegua vae co jae yandeYa ara güi ou vae. ⁴⁸ Yanderete ivi pegua oyovaque cuimbae ivi pegua jete ndive. Jae ramiño vi yanderete ara pegua oyovaqueta cuimbae ara pegua jete ndive. ⁴⁹ Yaguacatu ma cuimbae ivi pegua. Jae ramiño vi yaguacatuta cuimbae ara pegua.

⁵⁰ Jare cua che jae peve, cherivi reta: Yanderete

ívi pegua ndarau uique Tumpa iporoyocuia pe. Jae ramiño vi mbae icumegua vae ndarau uique icumegua mbae oĩ vae pe. ⁵¹ Mase, tamimbeu peve ndeiño uyecuua vae. Ndaraus opaete ñamano, ërei opaete ñanoita yanderete ipiau vae. ⁵² Jare cua uyeyapota imambae pegua penti jei vae pe Tumpa itrompeta uñee yave. Echa'ã Tumpa itrompeta uñaeta co, jare umanocue vae reta icove yeta güinoi vaerã jete ndarau etei icumegua vae. Jare yande imeño ñaĩ vae vi ñanoita yanderete ipiau vae. ⁵³ Echa'ã yanderete icumegua vae uyepepicata yanderete ndarau etei icumegua vae ndive. Jae ramiño vi yanderete ipuere umano vae uyepepicata yanderete ndarau etei ipuere umano vae ndive. ⁵⁴ Jare ñanoi yave yanderete ndarau etei icumegua vae yanderete icumegua vae ipepica pe, jare ñanoi yave yanderete ndarau etei ipuere umano vae yanderete ipuere umano vae ipepica pe, uyeyapota ma co Tumpa iñee pe uyecuatía oĩ vae. Echa'ã uyecuatía oĩ cuarãi: "Tumpa umiamiri mano jare umbai. ⁵⁵ Mano güinoi'ã etei mbaepuere yanderé. Ñanemiamiri'ã etei." Jucuarãi uyecuatía oĩ. ⁵⁶ Añave mano güinoi mbaepuere yanderé mbaeyoa jeco pegua. Jare mboroyocui uicuaaca mbaeyoa. ⁵⁷ Ërei ñamee yasurupai Tumpa pe. Echa'ã jae umiamiri mano yandeve yandeYa Jesucristo rupi.

⁵⁸ Jáeramo, cherívi reta aaú vae, piñemiatangátu jare piñemimirãta. Jecuaeño tanta peparavíqui yandeYa pe. Echa'ã picuaa quirãi peparavíqui yave yandeYa pe, yandeYa umbijecoviata peve.

16

Corepoti umbatita oporombori vaerã

¹ Añave tamimbeu peve quirãi pembati vaerã corepoti pembori vaerã ūru uñeñono tee Tumpa peguarã vae reta. Ayocui ma cua re upurugüirovia vae reta Galacia rupi uyembatimbati vae. Jae ramiño vi pe reta piyapo jucuarãi. ² Domingomingo pe penti penti piñuvatu corepoti Tumpa pembupuere rupi, agüiye vaerã pembati che aa pepi yave ramo. ³ Jare che aa avãe yave pepi, ameeta tupapire reta piparavo vae reta pe jare amondota reta Jerusalén pe güiraa vaerã corepoti pemeeta vae. ⁴ Jare icavi yave cheve che vi aa vaerã, jae reta yugüiraata cherupíe.

Pablo ipia pe uyemingueta uyapo vaerã vae re

⁵ Jare che aata pepi, Macedonia rupi aasa yave. Echa'ã aasata co Macedonia rupi. ⁶ Jare aramoi apitata pe reta ndive. Aramoi apitata pepi ambiasa opaete roí ara reta, pe reta chembori vaerã aa ye yave icotí'ã perenta güi. ⁷ Aipota'ã apou pepi michi peguaño. Echa'ã aipota apita pepi ima pegua, yandeYa uipota yave. ⁸ Êrei apitata cua pe Efeso pe Pentecostés ara ou uvãe regua. ⁹ Echa'ã ime cua pejeta mbaravíqui chepuere ayapo yandeYa pe vae, jare ime vijeta oyovaicho yandeYa iparavíqui ndive vae reta.

¹⁰ Êrei Timoteo oo yave pepi, piyandareco cavi jese, ipiagüive oí vaerã pepite pe. Echa'ã jae vi uparavíqui yandeYa pe, che ayapo rami. ¹¹ Agüiye quía tugüiríro. Êrei outa yave checotí perenta güi,

pembori ou vaerã checoti ipiacatu reve. Echa'ã aipota jae ou vaerã chepi ūru yanderivi reta jupié.

¹² Tamimbeu peve yanderivi Apolos. Chequirëi ete jae oo vaerã pepi ūru yanderivi reta jupié. Êrei uipota'ã etei oo pepi añaave. Êrei oota co jae ipuere yave.

Saludo reta

¹³ Piñemoa, pepiräta pepurugüirovia re, piyembucuimbae, piñemiatangätu. ¹⁴ Opaete piyapo vae piyapo pepuruau reve.

¹⁵ Añaave, cherivi reta, pe reta picuaa quiräi Estéfanas jenta pegua reta rani güirovia Cristo re Acaya pe, jare quiräi jae reta jecuaeño uparaviqui tanta uyeyocui vaerã ūru uñeñono tee Tumpa peguarã vae reta pe. ¹⁶ Jáeramo aipota pe reta piyeyocui vaerã cua nunga pe, jae reta peocui yave, jare vi piyeyocui vaerã opaete orembori vae reta jare uparaviqui yandeYa pe vae reta pe, jae reta peocui yave. ¹⁷ Ayerovia Estéfanas jare Fortunato jare Acaico yugüeru chepi vae re. Echa'ã jae reta uyapo cheve icavi vae pe reta pepuere'ã piyapo cheve vae. ¹⁸ Echa'ã jae reta chembiyerovia co. Jae ramiño vi jae reta pembiyerovia. Jáeramo pepuere pipiu cua nunga reta.

¹⁹ Upurugüirovia vae reta Asia rupi uyembatibati vae jei peve Tumpa ndiveño peñ. Aquila jare Priscila jare upurugüirovia vae reta uyembati jae reta jenta pe vae jei vi peve Tumpa ndiveño peñ yandeYa re perovia ramo. ²⁰ Opaete yanderivi reta jei peve Tumpa ndiveño peñ. Saludo reta piyapo piyupe yave, piñecuãva piyerau reve.

21 Che aicuatía cua chepo pe etei. Che vi jae peve Tumpa ndiveño peñ.

22 Ime yave quúa uau'ã yandeYa Jesucristo vae, Tumpa uiporaracata chupe. YandeYa outa.

23 YandeYa Jesucristo tumee peve ipiacavi.

24 Chepuruaau toñ opaete pe reta perovia Cristo Jesús re vae ndive. Amén.

**Nuevo Testamento Guarani Pe
New Testament in Guaraní, Western Bolivian
(BL:gnw:Guarani, Western Bolivian)**

copyright © 2012 Wycliffe Bible Translators, Inc.

Language: Guaraní, Western Bolivian

Translation by: Wycliffe Bible Translators, Inc.

Guaraní, Western Bolivian [gnw], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guaraní, Western Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022

09a8356f-416c-5877-91cf-40f681db481e